

2018-imut Ilassutissatut aningaasaliissutitut Inatsisissatut siunnersuut

(Aningaasaqarnermut Nunanilu Avannarlerni Suleqatigiinnermut Naalakkersuisoq)

Saqqummiussissut

(Aningaasaqarnermut Nunanilu Avannarlerni Suleqatigiinnermut Naalakkersuisoq)

1. Siullermeerneqarnera

Naalakkersuisut sinnerlugit matumuuna 2018-imut Ilassutissatut aningaasaliissutitut Inatsisissatut Siunnersuut saqqummiuppara. Inatsisartut Aningaasaqarnermut Ataatsimiititaliaata aningaasartuutissatut akuersissutai ukiumoortumik ilassutissatut aningaasaliissutitut inatsimmi, ukiumi aningaasanut inatsiseqarfiusumi tulliuttumi Inatsisartut ileqquusumik siullermeerlutik ataatsimiinneranni oqaluuserineqartussami katersorneqassasut, Inatsisartut Naalakkersuisullu pillugit Inatsisartut inatsisaanni § 16-imi aalajangersarneqarpoq.

2018-imut Ilassutitut Aningaasaliissutitut inatsisissatut siunnersuut taamaalilluni kingumoor-tumik aningaasaliinertut isigisariaqarpoq. Aalajangiinerit aningaasanut inatsimmi oqaaserta-liussatigut piginnaatitsissutit malillugit Naalakkersuisut, Inatsisartut Aningaasaqarnermut Akileraartarnermullu Ataatsimiititaliaata aamma Inatsisartut Suleriaaseq pillugu Ataatsimiititaliaata 2018-ip ingerlanerani aalajangiiffigereersimasaat ilassutitut aningaasaliissuti-nut inatsimmi aaqqissuunneqarput. 2018-imut Ilassutissatut aningaasaliissutitut Inatsisissatut Siunnersuummut ilanngunneqarsimapput ilanngussaq 1 aningaasaliissutit 2018-imi akuersissutigineqartunik takutitsisoq aamma ilanngussaq 2 2018-imi oqaasertaliussanut allannguutitut akuersissutigineqartunik takutitsisoq.

2018-imut Aningaasanut inatsit aamma 2018-imut ilassutissatut aningaasaliissutitut inatsisissatut siunnersuut ukiumut aningaasanut inatsiseqarfiusumut 2018-imut ataatsimut aningaa-saliissutitut tunngavoq. Taakku taamaalillutik Nunatta Karsiata 2018-imut Naatsorsuutaanut tunngaviupput Inatsisartut ataatsimiinnissaanni oqaluuserineqartussatut ilimagineqartut.

2018-imut Aningaasanut Inatsit IST-mi 6,7 mio. kr.-nik amigartooruteqarfiusussatut missingersuusiarineqarpoq IS-imilu 11,2 mio. kr.-nik sinneqartooruteqarfiusussatut missingersuusiarineqarluni.

Inatsisartut Aningaasaqarnermut Akileraartarnermullu Ataatsimiititaliaata Inatsisartullu Suleriaaseq pillugu Ataatsimiititaliaata 2018-ip ingerlanerani ilassutitut aningaasaliissutit ka-tillugit arfinillit akueraat, tamatumalu malitsigisaanik IST-mi inernerussatut missingersuutit 145,0 mio. kr.-nik ajorseriartinneqarput. Ajorseriaatit taakku sanaartornermut tunngasuni ilassutitut aningaasaliissutit akuersissuteqarnerup malitsigisaanik pipput.

Tamanna tunngavigalugu Ilassutitut Aningaasaliissutitut Inatsisissatut Siunnersuummi taku-neqarsinnaavoq ukiumi aningaasanut inatsiseqarfiusumi 2018-imi IST-imut missingersuu-

siarineqartoq 151,7 mio. kr.-nik amigartooruteqarfiussasoq aamma IS-imut missingersuusiarineqartoq 133,8 mio. kr.-nik amigartooruteqarfiussasoq.

Erseqqissuutitsinissaq pillugu matumani ukiumut aningaasanut inatsiseqarfiusumut 2018-mut tunngatillugu inaarutaasumik missingersuutit pineqarnerat oqaatigineqassaaq. 2018-mut naatsorsuutit Nunatta Karsiata 2018-mut Naatsorsuutaani takuneqarsinnaassapput.

Taamatut oqaaseqarlunga Naalakkersuisut 2018-mut Ilasutitut Aningaasaliissutinut Inatsissatut Siunnersuummut siunnersuutaat Inatsisartunut suliassanngortippara.